

19 Oktober 2013

Kepada Para Pastor, Penatua dan Pemimpin Gereja,

PER: Menilai dan Memahami Implikasi Keputusan Mahkamah Rayuan Terhadap *The Herald Case*

Pada 14 Oktober 2013, Mahkamah Rayuan telah memberi penghakimannya ke atas rayuan yang dibuat oleh Kerajaan Malaysia untuk menghalang penggunaan kalimah “Allah” oleh *The Herald*. Pendek kata, Mahkamah Rayuan telah menolak keputusan yang telah dibuat oleh Hakim Datuk Lau Bee Lan di Mahkamah Tinggi sebelum ini yang menyatakan *The Herald* mempunyai hak menurut perlembagaan untuk menggunakan kalimah “Allah” dan juga mengatakan bahawa adalah salah untuk Menteri Dalam Negeri mengenakan syarat untuk melarang penggunaan kalimah dalam lesen percetakan *The Herald*.

Mahkamah Rayuan berpendapat bahawa Menteri itu telah menjalankan budi bicaranya dengan betul di bawah Akta Mesin Cetak dan Penerbitan untuk mengenakan syarat itu dalam larangannya terhadap penggunaan kalimah “Allah” ke atas *The Herald* dalam penerbitan Bahasa Malaysianya. Hakim-hakim berpendapat bahawa jika *The Herald* dibenarkan untuk menggunakan kalimah “Allah” dalam penerbitannya, ia akan berkemungkinan mengugat ketenteraman awam dan kekeliruan di kalangan komuniti orang Muslim.

Apa yang menjadi kebingungan dan kebimbangan yang besar bagi komuniti orang Kristian adalah pandangan dan pendapat hakim-hakim yang membuat mereka mencapai kesimpulan seperti berikut:

1. Islam adalah agama Persekutuan dan agama-agama yang lain hendaklah diamalkan dengan aman dan harmoni bersama dengannya. Dalam kes penggunaan kalimah “Allah”, keamanan dan keharmonian orang Islam akan tergugat kerana ia akan menyebabkan kekeliruan kepada orang Islam dan ia mungkin mencetuskan kepada sensitiviti orang Islam.
2. Penggunaan kalimah “Allah” adalah satu amalan yang tidak penting dan bukanlah sebahagian (integral) daripada agama Kristian. Ini adalah kerana “Allah” bukanlah Tuhan yang disebut dalam Alkitab dan ia adalah satu nama yang khas untuk Tuhan dalam agama Islam. Orang Kristian tidak patut menggunakan kalimah ini kerana pemahaman mereka tentang Tuhan adalah sangat berbeza daripada Tuhan yang ada dalam agama Islam. Maklumat berdasarkan fakta di Mahkamah Tinggi bahawa penggunaan kalimah “Allah” adalah sangat penting dan merupakan sebahagian daripada agama Kristian telah diketepikan kerana ia banyak berdasarkan kepada pandangan penulis-penulis seperti mana yang telah disebutkan dalam salah satu penghakimannya.
3. Oleh sebab Islam adalah agama rasmi Persekutuan dan kebajikan sesebuah kumpulan mesti tunduk kepada kepentingan komuniti orang Islam yang lebih besar dan adalah majoriti, maka ia adalah betul untuk Menteri itu untuk mengenakan syarat larangan itu untuk melindungi kesucian Islam dan untuk memastikan bahawa Islam tidak akan tergugat oleh apa-apa ugutan atau percubaan untuk melemahkan kedudukannya sebagai agama Persekutuan.

Implikasi-Implikasi

Beberapa implikasi boleh disimpulkan di sini.

1. Kebebasan beragama di Malaysia untuk kumpulan minoriti sekarang adalah tertakluk kepada telunjuk agama Islam dan sentimen orang Islam. Perkara seperti ini adalah tidak dapat diterima dan tidak diinginkan dalam satu masyarakat majmuk seperti di Malaysia. Orang Sikh juga merasa kesan ini juga kerana mereka juga menggunakan kalimah “Allah” dalam buku-buku suci mereka.
2. Badan-badan dan institusi-institusi di negara seperti kehakiman telah mengambil alih peranan untuk menentukan apa yang penting dan apa adalah sebahagian daripada (integral) sesebuah agama. Ini langsung tidak dapat diterima kerana skop yang merangkumi apa yang patut ada dalam sesebuah agama dan apakah yang penting dan merupakan sebahagian daripada (integral) agama itu patut ditentukan oleh komuniti agama itu sendiri. Untuk negara memberi hak kepada dirinya untuk memainkan peranan ini, maka ia bercanggah kepada Artikel 11(3) dalam Perlembagaan Persekutuan di mana setiap agama mempunyai hak untuk mengendalikan hal-hal agamanya.
3. Untuk mengatakan sesebuah kumpulan atau komuniti mesti tunduk kepada kepentingan komuniti yang lebih besar akan lambat-laun mengakibatkan corak pemerintahan yang tidak adil dan kejam (tirani) oleh kumpulan orang majoriti di mana apa yang betul tidak akan lagi ditentukan oleh kebenaran tetapi oleh keinginan kumpulan orang majoriti. Ini bercanggah sama sekali asas-asas perlembagaan dan peranan demokrasi pluralis.

Peranan Gereja

Tiada waktu yang lebih penting daripada waktu-waktu ini untuk datang bersama-sama untuk berdoa untuk negara. Seperti dalam masa Ester, satu musim berdoa dan berpuasa adalah amat tepat dan sesuai. Oleh itu, orang Kristian patut berdoa untuk orang-orang yang berada dalam kedudukan berautoriti supaya akan memerintah negara untuk kebajikan semua orang supaya negara ini akan berhasil dan maju.

Kita perlu bekerjasama dengan mereka yang dari kepercayaan lain, orang-orang intelek yang sehaluan dan komuniti antarabangsa untuk mendedahkan pemerintahan yang tidak adil dan kejam (tirani) dan roh kekeliruan yang sedang ditabur di dalam negara kita, supaya keamanan dan keharmonian akan berterusan. Kita sebagai orang Kristian perlu terus membina jambatan dengan orang daripada agama lain yang berpengaruh supaya kita bersama-sama dapat menyumbangkan kepada suasana saling menghormati dan menerima di mana semua orang dapat merayakan keunikan dan perbezaan satu sama yang lain.

Orang Kristian dalam pada waktu ini mesti berani dan terus memegang kebenaran dan di mana kita boleh bangkit dan berbicara – kepada wakil-wakil kita yang telah dilantik, kawan-kawan kita dan rakan-rakan sekerja kita untuk membuat satu pendirian untuk satu kebaikan bersama supaya Malaysia benar-benar akan menjadi sebuah negara yang adil dan harmoni.

Sementara itu, janganlah kita cemas, seperti mana Pemazmur mendorong kita dalam Mazmur 37. Marilah kita berdiam diri dalam Tuhan dan nantikanlah Dia dengan kesabaran untuk bergerak bagi pihak kita.

Yang Benar



En. Eugene Yapp
Setiausaha Agung
NECF Malaysia